

au trauers de nos cœurs, comme mon doigt fait au trauers de ce trou. Ce malin esprit fait de nous ce qu'il veut, pour moy ie crains fort qu'il ne m'arreste en chemin & qu'il ne m'attrappe au milieu de ma course. Que si iamais ie vay au Ciel, le Pere qui nous enseigne y fera si haut qu'à peine le pourray-je voir; car que faisons nous pour y aller. Or fus, ie desire monstrier plus de courage dorefnauant, ie veux satisfaire pour mes fautes & marcher droit le reste de mes iours: là-dessus il tire cette grande discipline qu'il cachoit deffous sa robbe la monstrier à toute l'assemblée, & esleuant le ton de sa voix, ce n'est pas là le feu d'Enfer que i'ay merité, disoit-il, ce n'est qu'une petite paille en comparaisun de ce qu'on souffre là-bas dans la demeure des Demons. Quand on mettroit mon corps en sang avec ce foïet & qu'on deschireroit ma chair de coups, ie ne croirois pas pourtant auoir payé mes debtes & satisfait à la iustice de Dieu; mais ie sçay qu'il est infiniment [43] bon & qu'il fait misericorde à ceux qui luy demandent pardon de cœur. Tenez, dit-il, au Capitaine, voila la discipline que ie vous mets entre les mains & mes espauls nuës que ie vous presente, frappez & ne m'épargnez point. Le Capitaine obeyt sur l'heure à sa parole, & luy descharge sur le dos vne gresle de coups, ce penitent demande humblement pardon à Dieu de ses fautes pendant qu'on le flagelle, & se iette par terre pour la baïser, & se releuant inuite tous les Chrestiens à fuiure son exemple, il crie, venez tant que vous estes de coupables, venez vous presenter deuant l'Autel, venez satisfaire à la iustice de Dieu. On ne disputa point qui passeroit le premier, les plus proches furent les premiers, chacun